

Guilielm.
Malmef.

Nepan Wynnroep, id est, *Novum monasterium*. Quod Ælfredus fundavit, & ad construendum ejusdem officinas mercatus ab Episcopo terræ spatium, ad unum quemque pedem marcam pondere publico pensitavit. Hoc vero, uti illud vetustius, conjugatis presbyteris positum erat, qui postea miraculo Crucis loquentis, & eorum institutum improbantis, à Dunstano Archiepiscopo Cantuariensi exturbati, & in eorum locum Monachi substituti. Hæc monasteria contiguas parietibus ita vicina erant, ut voces canentium in altero aliis obstreperent, unde cum similitates monachi invicem exercerent, quæ postea in inimicitias proruperunt; & aquarum magna vis collecta ab Occidentali porta per devexos vicos defluens ad novum hoc Monasterium stagnaret, aëremque insalubrem exhalaret, post ducentessimum ab ipso conditum annum, templum in Septentrionale urbis suburbium, quod *Hide* dicunt, translatum erat. Vbi Henrico Primo permittente, monasterium amplissimum & pulcherrimum construxerunt monachi, quod paucis interjectis annis, dolo Henrici Blefensis Episcopi Wintoniensis (ut privata loci hujus historiola testatur) misere deflagavit. Quo incendio crux, Danici Canuti donarium, in quod, (ut schidæ habent antiquæ) totius Angliæ annuum redditum contulerat, absumpta fuit, Monasterium nihilominus resuscitatum in miram amplitudinem, ut ipsæ ruinae jam loquuntur, ad funestam usque monachorum periodum sensim excrevit. Tunc enim hoc demolitum, & in illud alterum S. Trinitatis, quod Cathedralis est Ecclesia, exturbatis monachis, Decanus, & Præbendarii duodecim sunt inducti. Ad Ecclesiæ Cathedralis orientalem partem, Episcoporum Palatium amplissimum, *Wobesey* dictum, crebris turribus incinctum, rivuloque fere circumfusum, ad mœnia pertingit, & in Australi suburbio Collegium elegans è regione prospectat, quod Guilielmus *Vickham* hujus sedis Episcopus, maximus inter Anglos bonarum literarum pater & patronus, cujus laus omni seculorum memoria literarum monumentis inveterascet, in scholam construxit, & dicavit, è qua scilicet est doctissimorum in Rempub. & ecclesiæ proventus. In hoc enim *Guardianus*, Socii x, scholarchæ duo, & Scholastici 70, alique nonnulli honestissime aluntur. Alia etiam eximia erant in hac urbe ædificia, (fuerunt enim plurima religioni consecrata) quæ cum tempus expugnaret, memorare non libet, Parthenonem tamen illam, sive virginum Monasterium quod Ælfwida Ælfredi Regis uxor posuit, præterire nolo, cum longe celeberrimum fuerit, ut reliquæ jam ostendunt, & ex hoc Matildem Malcolm Scotorum regis filiam sibi in uxorem acceperit Henricus Primus, per quam veterum Anglorum stirps regia Normannicæ coaluit, & ille à populo Anglico plurimum gratiæ inivit. Illa enim Regis Edmundi *Ferrei lateris* ex filio Edwardo *Exule* proneptis: mulier cum cæteris virtutibus, quæ quidem digna regina essent, ornata omnibus; tum veræ pietatis incredibili studio flagrans. Vnde in ejus laudem vetus est *Tetrastichon*,

*Prospera non letam fecere, nec aspera tristem,
Aspera risus ei, prospera terror erant.*

*Non decor effecit fragilem, non sceptrum superbam;
Sola potens humilis, sola pudica decens.*

De Guidone Warwicensi fabellis decantato, qui singulari certamine Colbrandum illum Danicum Typhoëum hic devicit, de Waltheoso Huntingdoniæ Comite hic capite truncato, ubi postea Capella fuit S. Ægidii, & egregio illo sanctæ Crucis Hospitali adjuncto, ab Henrico Blefensi Regis Stephani fratre, hujus urbis Episcopo fundato, & Henrico de *Beaufort* Cardinale adaucto, non est cur aliquid dicam, cum ex historiis sint omnibus pervulgatissima.

Quod ad Wintoniæ Comites spectat, ut taceam Clitonem Saxonem à Normannis ayto honore exturbatum, Ioannes Rex Saërum *Quincy* Wintoniæ Comitem dixit, qui usus est pro insignibus baltheo militari, *Fesse* vocant, cum * lemnisco septemplexi, ut in sigillo vidimus. Illi successit Rogerus filius, qui septem * Rhombos aureos rubro in scuto gestavit. Sed in illo honor evanuit, cum sine liberis masculis diem obiisset. Duxit enim filiam natu maximam Alani Domini Gallovidiæ in Scotia ex uxore priore, & alteram hæredum, cujus jure fuit Constabularius Scotiæ. Sed ex illa tres tantum filia nata; prima Guilielmo de *Ferrariis* Comiti Derbiæ, altera Alano de *la Zouch*, tertia Cominio Buchaniæ in Scotia Comiti enupta. Longo inde tempore interlabente, Hugo *Le Despencer* eo titulo à Rege Edwardo Secundo tantum ad vitam donatus, & ab eo unice dilectus, sero cum filio sensit, qualia sint præmia regis gratiæ: uterque enim à populo furente morte atrocissima multatus. Satis longo deinde intervallo Edwardi III beneficentia Ludovicus Brugensis Belga Baro de *Gruthuse* & Princeps *Steinhufsi*, qui eum patria profugum in Belgio foverat, hunc titulum cum insignibus Rogeri *Quincy* non dissimilibus accepit, quem, defuncto Edwardo, Henrico VII in manus reddidit. Nostra vero memoria Guilielmum *Porrett*, Angliæ Thesaurarium novo Marchionis Wintoniæ titulo honoravit Edwardus Sextus, quo etiam ejus posterum nunc fruuntur. Ventæ hujus longitudinem part. XXI I, Latitudinem 51 grad. esse superioris ætatis observationes docuerunt.

A Venta magis ad Ortum, *Hombre* fluvius vasto ore in Oceanum profunditur, *Homelea* Bedæ dicitur, qui, ut habet ille, per terras Iutarum *Solente* intrat, sic enim illi vocatur fretum, quod *Veftam* insulam, & Britanniam interluit, in quo stans horis æstus reciprocatio utrinque ex Oceano magna violentia irrumpens, & occursans, tantam admirationem antiquis illis fecit, ut in miraculorum Britannia numerum retulerint. De quo en tibi ipsa Bedæ verba, *Bini æstus Oceani, qui circum Britanniam ex infinito Oceano Septentrionali erumpunt, sibi met invicem quotidie compugnantes occurrunt, ultra ostium fluminis Homelea, finitoque confluxu in Oceanum refusi, unde venerant, redeunt.* In hoc fretum etiam evolvitur fluviolus qui prope *VVarnford* ortus transit inter *Forrestas* de *VValtham*, ubi ædes sunt amplæ Episcopi Wintoniensis, & de *Bere*, per *Tichfeld* quondam Monasterium à Petro de *Rupibus* Episcopo Wintoniensi positum, nunc primariam sedem *Writheosleorum* Southantoniæ Comitum. Inde flexuoso anfractu statim

Comites
Wintoniæ.
Insignia
Quinciorum.
* A Lable
of 7.
* Mascles
voided.

Hamble.

Solente.

Tichfield.

Hide Abbatia.

Collegium
Wichamcum.
Guilielm.
Wickhamus.

S. Mariæ
Abbey.

Matildis
uxor Henrici primi.